

Kontuola

ANTZUOLA / Egubakoitza / 2003ko abenduaren 5a / 181. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Antzuolako erretiratuek Mizpirualde egoitzakoei astelehenerak alaitzen dizkiete

ENEIDA ITURBE

Antzuolako erretiratuek ekintza kulturalak egiteaz gain sozialagoak ere egiteko beharra ikusi zuten duela bi urte inguru. Ordutik hona, Bergarako Mizpirualde egoitza bisitatzan dute astelehenero, han daudenei arratsaldeak atseginagoak egiteko asmoz.

Astelehen arratsaldeak bereziak izaten dira Bergarako Mizpirualde egoitzan; hango bizilagunak kantuan egiteko biltzen dira, eta, gainera, Antzuolako erretiratuen bisita jasotzen dute. Antzuolako lau edo bost lagun joaten dira egoitzara. Han dauden herritarrak bisitatzan dituzte lehenengo, eta, ondoren, normalean bisita askorik jasotzen ez duten bizilagunekin pasatzen dute arratsaldea, pasean eta berriketan.

Bi urte inguru daramatzate erretiratuek astero Mizpirualdera joaten. Ekimen hau Erretiratuen batzordean sortu zen. Asintxio Azkarate batzordeko presidentek azaldu duenez, ekintza kulturalak antolatzeaz gain sozialagoak ere egiteko beharra ikusi



Facunda Laskurainek gustura hartu zituen herritarrak pasa den asteleheneran.

zuten. Antzuolako gizarte-laguntzailearekin hitz egin zuten eta hark proposatu zien Mizpirualden borondatezko lana egitea. Hala, hogeita hamahiru lagun

elkartu ziren eta txandatan joaten dira Mizpirualdera, lau edo bost lagun astean. Asteleheneran, arratsaldeko 17:00etatik 18:30ak arte izaten dira han.

Hara heldutakoan lehen lana gizarte-laguntzailearekin hitz egitea izaten da. Hark esaten die nork duen bisita jasotzeko beharra. Eurekin igarotzen dute arra-

“Ordu batzuez burua egoera tristetik aldentzen laguntzeko joaten gara egoitzara”

tsaldea, Juanita Zabalok esan bezala, “burua egoera tristetik aldentzen laguntzeko”.

Mizpirualden dauden antzuolarrak ere bisitatzan dituzte, noski. Haien gustura hartzen dituzte herritarrak. Horren adibidea da Facunda Laskurain. Pasa den asteleheneran irribarretsu hartu zituen gelara joan zitzaizkion lau lagunak, eta kontu-kontari ibili ziren.

BOLUNTARIOAK BAINO GEHIA

Juanita Zabalok azaldu digunez boluntario izatea eta boluntariotza ez dira gauza bera. Boluntariotzak borondatea baino gehiago eskatzen du; ikasten eta birziklatzen joatea, hain zuzen ere. Boluntariotza egiten duten antzuolar horiek meriturik, behintzat, ez dute falta.

ERREPIDEA

Bost edo sei hilabeteen egongo da itxita Bergarako sarrera

ENEIDA ITURBE

Bergarako Urteaga kalea itxi egin dute berriz. Oraingoan, gainera, bost edo sei hilabetez egongo da horrela, Foru Aldundiak mendiari eusteko lanak egin bitartean. Antzuolako Udalak Aldundiko arduradunekin hitz egiteko asmoa dauka proiektua ezagutzeko.

Bergarako Urteaga kalea pasa den asteko eguazten gauean itxi zuten, Eskusarte harrobian

auriak eragindako lur eta harri erorketak zirela eta. Urteagako 29. zenbakiko biztanleek etxeak utzi behar izan zituzten eraikin hori arriskuan zegoelako. Harrobiak eraikin horretarantz mugitzeko joera dauka.

Foru Aldundiak mendiari pisua kendu eta hari eusteko asmoa du. Horretarako proiektua egingo du lehenengo eta, ondoren, lanekin hasi. Bost edo sei hilabetez, behintzat, autoak ezin izango dira Urteaga kalean ibili, itxita jarraituko du eta.

ANTZUOLARREI BEREZIKI ERAGITEN DIE

Datorren hilabeteetan Antzuolatik Bergarara joateko saihebidia erabili beharko da. Horrek egin beharreko bidea ia bikoiztu egiten du. Entzun dira herritarren lehen kexuak; izan ere, kale hori ixten duten hirugarren aldia da.

Herritarrei bereziki eragiten die, hortaz, itxiera horrek. Hori dela eta, Udalak Gipuzkoako Aldundiak azalpenen bat ematea espero zuen. Ez da hala izan, eta orain Udala bera jarriko da Aldundiarekin harremanetan.

LABUR

Talleres Antzuola egon zen eraikineko bi horma zutik utziko dituzte

Aurreko zenbakian, Talleres Antzuola egon zen eraikina bota egingo dutela argitaratu genuen. Hala egingo dute, baina etxearen balioa dela eta, bi horma bere horretan utziko dituzte. Kalegoi aldeko horma eta Ondarrera begiratzan duena zutik utziko ditu enpresa eraikitzaileak. Aldiz, erreka aldeko horma eta eraikinaren barne aldea bota egingo ditu. Urtarrilean egingo dute lan hori. Enpresa eraikitzailearen asmoa da han etxebizitzak egitea.

EHNA egiteko aukera izango da Antzuolako udaletxean abenduaren 14an

Euskal Herriko Naziotasun Aitorpena, EHNA, eskatzeko aukera izango dute antzuolarrek abenduaren 14an, domeka. Agiri hori eskuratu nahi duenak hiru argazkirekin joan beharko du udaletxera, eta 15 euro ordaindu beharko ditu. Bai Euskal Herriari taldeak antolatuko du ekimena. EHNA egiteko ordutegia ondorengo izango da: 11:00etatik 13:00etara eta 18:30etik 20:30era.

GABONETAKO APAINKETA

Gaur piztuko dituzte
Gabonetako argiak

ENEIDA ITURBE

Pasa den astean hasi ziren Gabonetako argiak jartzen herrian. Gaur piztuko dituzte lehenengoz, eta hala egingo dute datozen eguetan, 2004ko urtarrilaren 6a arte. Aurretik, Udalaren helburua argiak herri osoan jartzea izan da, eta ez herrigunean bakarrik.

Egunez ere ikus daitezkeen izarrak ageri dira azken egun hauetan Antzuolan. Izan ere, herriko hogeita bi kale-argi izar iturako argiz apaindu dituzte.

Izarrak Kataluniako enpresa bati alokatu dizkio Udalak. Herriko bi sarreretan *Zorionak* dioten argiak jarri dituzte. Horiez gain, Beheko auzoan, Errekalden eta Ondarren ere argiak daude; eta elizan izar handi bat. Udaletxeko balkoian argi-jauzia deritzona egongo da.

Aurreko urteetan baino diru gehiago erabili du Udalak aurtengo Gabonetako apainketa egiteko. Argien alokairuan 4.000 euro gastatu ditu, eta muntaketa lanetan 2.000 euro.



Herriko kale-argietan izar iturako argiak jarri dituzte.

IKERKETA

Martxan da gazteen
inguruko ikerketa

E.I.

Nerea Altunaren aurpegia ezaguna egingo zaio zenbaiti; izan ere, Antzuolako gazteen aisialdia aztertzen dihardu. Hain zuzen ere, aurreko astean eman zion hasiera ikerketari Txatxilipurdiko kide den Nereak. 12-17 urte bitarteko gazteen iritzia jakiteko,

horiei inkestak banatzen aritu da egun hauetan. Datozen bi hilabeteetan gazteen iritzia eta herriko hainbat eragilerenak jasoko ditu.

Ikerketako emaitzekin txostena idatziko du, eta horren arabera gazteei herrian zer eskaini erabakiko da. Guztia egiten lau hilabete emango dituzte.



Nerea Altuna aretxabaletarra ari da Antzuolako gazteen ikerketa egiten.

KIROLA

PARTIDUAK

FUTBOLA

Abenduak 6
12:00: Antzuola-Lazkao (Gazteak)
15:30: Antzuola-Eibartarrak B (2. erre.)

PILOTA

Abenduak 6 (Gipuzkoako txapelk.)
16:30: Olalde-Gazteleku (kadeteak)
Olalde-Eskoriatza (eskuz nagus.)
Olalde-Altzatarrak (paletaz na.)

EMAITZAK

FUTBOLA

Lagun Onak 5 Antzuola 4 (2. erreg.)
Lazkao 5 Antzuola 1 (Gazteak)
Antzuola 0 Bergara 5 (Kadeteak)

PILOTA

Gipuzkoako txapelketa
Eskoriatza-Olalde (eskuz infan.) 18-12
Bergara-Olalde (esk. kadeteak) 7-22
Olalde-Ilunpe (esk. nagusiak) 16-22
Oiangu2-Olalde (paletaz nagus.) 25-35

LABUR

Erretiratuen karta
txapelketa egongo
da abenduan

Erretiratuen batzordeak, urtero bezala, karta txapelketa antolatu du. Punttoan, bris kan, tutean eta musean arituko dira. Parte hartu nahi duenak abenduaren 14a baino lehen eman beharko du izena. Kanporaketak hilaren 15a eta 19a bitartean jokatuko dituzte.

AGAk txistorra
jana eskainiko du
domekan, hilak 7

Antzuolako Gazte Asanbladak txistorra jana egingo du datorren domekan, abenduak 7. Arratsaldeko 19:00etan izango da, Kalebarren kalean. Herritar guztiei zuzenduta egongo da txistorra jana eta borondatea eskatuko dute pintxo eta edarien truke.

Zenbait ekintza egiteko asmoa dauka AGAk datozen hilabeteetan. Duela bi aste, esate baterako, *gaztetxea* antolatu zuten udaletxe azpian; benetako gaztetxe baten falta salatzeke egin zuten hori.

Kongori buruzko erakusketa

Anelkarrek Kongori buruzko erakusketa jarri du Orlanen. Aurreko asteburuan zabalik izan zen eta datorren honetan ere hala izango da. Zapatuan, abenduak 6, 18:30etik 20:00ak arte egongo da zabalik, eta domekan goiz eta arratsaldean, 12:00etatik 14:00ak arte eta 18:30etik 20:00ak arte.

Kongon bizi duten egoeraren eta Kansenia lurraldean egiten ari diren proiektuaren berri izan eta hango bideo bat eta zenbait artelan eta bitxikeria daude ikusgai.

LARREA

TABERNA

Kalebarren 17
ANTZUOLA

ANTZUOLA

Apainketak eta
isolamenduak
Pladurrezko dibisioakKalegoi 21 ANTZUOLA
676 997 400
Biltegia: 943 78 70 40

Tomas Gezalaga

Apainketarako eta
industriarako pinturak
•
Paper margotuak
•
Moketak eta tapizatuakKalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA

GAILUR

taberna eta
gozotegiaBuztinzuri 13 ANTZUOLA
Tf. 943 78 70 32

Tomas Gezalaga

Zoruen kutxilatua
eta
barnizaketaKalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA